

Baez Daih'it Cawjngaiz

第一次煮饭

贵港市覃塘区蒙公乡高占小学五年级 黄凤玲

Gou daj haeujhag daengz seizneix, ginggvaq haujlai “baez daih'it”, lumjbaenz baez daih'it gaujsi, baez daih'it ndaej ciengj, baez daih'it hwnjmuengx, baez daih'it…… Hoeng, hawj gou geiq ndaej ceiq laeg dwg baez daih'it cawjngaiz. Baez siengj hwnj gienh saeh neix, gou couh riu bak mbouj haep.

Haenx dwg ngoenz singhgiz ndeu, daxboh daxmeh cungj mbouj youq ranz, gou siengj gou coengzlaiz mboujcaengz bang daxmeh guh gvaq hongranz, baez neix caen dwg ndei seizhaeuh, sojyij couh cawj baez ngaiz ndeu ba, hawj daxboh daxmeh loh fwngz he, hawj gyoengqde sim'angq sim'angq baez ndeu.

Gangj guh couh guh, gou sien dauz haeux, dingq daxmeh gangj gvaq haeuxngaiz aeu dauz song sam baez cij ndaej, gou couh hag gij

yiengh daxmeh dauz haeux lo. Hoeng, dauz baez haeux he, couh miz di “lwgmanz” swnh raemx “ndotdeuz”, ndigah, dauz ndaej le haeux couh noix bae sam faenh cih it lo. Gou dawz haeux dauz ndei haenx boek haeuj ndaw gu bae, cap doeng dien, couh gag hwnjmuengx bae saj lo.

Gou cingq saj ndaej mizyinx seiz, mbouj rox daj gizlawz cienz daeuj gij sing “bili bala”. Gou swnh sing ra bae, fatyienh dwg daj ndaw bakcauq cienz daeuj, gou sikhaek siengj daengz gu ngaiz haenx, biengj hai fagu baez yawj, ha, mbwn ha, gij ngaiz neix dwg gou cawj ma? Gij saek caengz ndaem caengz henj, sawq gwn di he, “bibi”, geng lumj rinreq, lij haemzningj dem. Neix baenzlawz guh ne? Gou simgip lumj duzmoed youq ndaw gu ndat, cienq bae cienq dauq, mbouj rox baenzlawz guh cijndei. Gou cingq youheiq seiz, daxboh daxmeh dauqma lo. Daxmeh cam: “Dahlwg, mwngz guh gijmaz ha?” Gou gazdwdgdw naeuz: “Gou……gou……guh……guh……” “Yi, gijmaz feihdauh?” Daxmeh mupmup aen ndaeng, de itmienh cam itmienh caeuq daxboh byaij haeuj ndaw bakcauq, baez yawj cungj mingzbeq lo, “hahaha……” Song boux de riu hwnjdaej, daxmeh bonjlaiz couh gyaeh riu, seizneix riu ndaej raemxda lae okdaej lo, daxboh hix riu dwk hwet gungj lo. Doeklaeng gou cij rox, dwg aenvih gou cawj ngaiz seiz lumz cuengq raemx lo, cij deng remj baenz yienghneix.

Gou siengj: Mboujlwnh guh gijmaz saeh, aeu sijsaeq gvanhcaz, hawsim hagsib, cij ndaej guhbaenz. (指导老师:覃珍团)



Gij Vah Laeglemx Ndaw Gyausiz

教室里的悄悄话

上林县大丰镇皇周小学三年级二班 谭磊

“Lingling” lingz cuengqhag yiengj lo, gyoengq doengzhag lumj raemxrongz nei lizhai yozyau, seizneix, ndaw yozyau bienq ndaej caemlwglwg. Youq ndaw gyausiz caemlwglwg neix, dwg mbouj dwg mboujmiz saek di singyaem ne? Mbouj dwg, sou dingq, ndaw gyausiz sam (1) ban cingq gangj vah laeglemx ne!

Rumzbaek cihuhu, ci ndaej aen cueng bohliz yiengj mbouj dingz. Sawqmwh, mbouj siujism, dawz sam (1) ban aen daiz ndeu dongj fan bae lo, de nyaenx mbouj ndaej swenj hwnjdaej.

Hwzbanj nyaengq ngoenz ndeu le, cingq ninzndaek, sawqmwh fwt singj gvaqdaej, de cam: “Mwngz guh gijmaz ha, daiz daegnuengx?” Aen daiz dingj in dwk naeuz: “Cungj dwg bouxcawj gou mbouj roxsoq, de baenz ngoenz cungj ngauz gou, youq gwnz ndang gou dub bae dub dauq, hawj gou ndaeng fod naj foeg liux. Mwngz yawj, di lumz neix couh ci gou laemx bae lo.” Gangj dwk youh nyaenx mbouj ndaej swenj aeyo aeyo hwnjdaej lo.

Seizneix, baengzyoux de——Aen eij hix gangj vah hwnjdaej: “Dwg ha, bouxcawj mbouj roxsoq, baenzngoenz cungj hangz raeuz. De ciengzseiz youq gwnz ndang gou caij bae caij dauq, diuq hwnj diuq roengz, naengh youq gwnz ndang gou, enj aek enj ai, soqlai mbouj hawj gou seiq cik ga doengzseiz bungz namh, gij gvanhceiz gou soeng lo, de hix mbouj bang gou niuj gaenj bae.” Gangj dwk, rumz ci aen eij

youh yiengj hwnjdaej lo.

Seizneix, daihseiq cuj aen daiz ndeu hix daej hwnjdaej lo.

Daihgya cam: “Dou nanzgvaq, mwngz daej gijmaz?”

De naeuz: “Gaej gangj lo, saedceij gou yaek gatsat lo.”

“Vih gijmaz ne?” Caezgya cungj geizheih dwk cam.

De naeuz: “Aenvih bouxcawj gou itdingh dawz gou loengh baenz ga' gvez, najraiz cij dingz, bouxcawj gou baez daengz gaujsi, couh aeu bit youq gwnz naj gou sij, veh, hawj naj gou cungj raiz liux. Lij aeu mid youq naj gou gaek cih, naj gou raiz liux lo.” Gangj sat youh daej hwnjdaej.

“Dingq, dwg gijmaz singyaem?” Caezgya muengh bae, yenzlaiz dwg aen daiz daihngaih cuj daihhaj hangz cingq ciengqgo. Caezgya youh cam: “Caezgya cungj siengsim, mwngz vih gijmaz baenzneix angq?”

De naeuz: “Mbouj dwg moix boux doengzhag cungj yienghneix guh, sou yawj, bouxcawj gou couh ciuqgoq gou gig ndei, ngoenznaengz daej le, couh aeu soujgaen uet gij faenz gwnz ndang gou, baij gou cingq le cij okbae hozdung. Danghnaeuz genga gou soeng le, de bang gou niuj maenh bae, caeuq sou beij, gou vuenyungz raixcaix lo!”

Rumz dingz lo, gyoengqde hix mbouj gangj vah lo, ninz ndaek lo.

(指导老师:覃仲南)



Daegnuengx Bienq Lo

弟弟变了

德保县隆桑中心校五年级 王玉霜

Daegnuengx gou heuh Siujminz, bineix muenx haj bi lo. Daegnuengx gou bingzseiz gip ndaej doxgaiq doek, coengzlaiz mbouj boiz hawj bouxwnq, hoeng seizneix de bienq lo.

Miz ngoenz ndeu gyanghaet, daxmeh soengq daegnuengx bae youwzyenz hwnjhag, youq gwnz loh, daegnuengx angq dwk ciengqgo hwnjdaej, sawqmwh, daegnuengx yawjraen gwnz loh miz mbaw ngaenz ndeu, couh gungj hwet gip hwnjdaej yaengx hawj daxmeh yawj, naeuz: “Daxmeh, maenz ngaenz ndeu.”

Daxmeh yawjraen le cam: “Siujminz, gip ndaej ngaenz, wnggai baenzlawz guh?” Daegnuengx siengj le siengj, naeuz: “Gyau hawj lauxsae, hawj lauxsae boiz hawj boux ngaenz doek haenx.”

Daegnuengx daeujdaengz youwzyenz, dawz ngaenz gyau hawj lauxsae, naeuz: “Lauxsae, neix dwg gou youq gwnz loh gip ndaej.”

Gvaq yaep ndeu, hwnjdangz lo, lauxsae byaujyangz daegnuengx, lij naeuzhawj siujbaengzyoux aeu yiengq daegnuengx hagsib, gangj sat, lauxsae hawj duj vahoengz iq he hawj daegnuengx. Daegnuengx ndaej dujva hoengz neix angq raixcaix.

Gou rox aen siusik neix, ndaw sim angqhaenh naeuz: “Daegnuengx ha daegnuengx, mwngz caen bienq lo, bienq ndaej rox dauhleix lo.” (指导老师:黎才新)

Sing Seiqgeiq

四季的声音

武鸣县仙湖镇中桥小学六(2)班 潘思宇

Saucin daej lo, de dawz raejrub daiq daej. Gwnz biengz longz hwnj buh heu; fwncin “sasa” dwk doek hwnjdaej, va'iq, faexlwg caeuq doenghnaz cungj “gulu gulu” dwk ndoet gaeuq bae; duzgoep ninz singj lo, “gva' gva' gva'” heuh mbouj dingz, lumj naeuz: “Caen ndei lo, seizcin daej lo.” Yawj, geij duz vaizmeh caeuq vaizlwg youq benq nywj doiqmienh gwn nywj, duz vaizmeh “momomo” heuh dwk, lumj naeuz: “Gij nywj gizneix ndeigwn raixcaix, gyoengqdoih vaiq gvaqdaej ha!”

Dahcej seizhah daej lo, de dawz ndithaenq daiq daej, gwnzbiengz hwngq lo. Duzbid gwnz faex yaep he couh rox heuh “nye'nye’”.

Daxheih seizcou daej lo, de dawz rumzliengz daiq daej. Gwnz faexhung henz roen, mbawfaex henj lo, raq rumz iq ci daej, mbawfaex “sasa” daj gwnz faex loenq roengzdaej, cw hoemq daihdeih.

Daxgoeng seizdoeng daej lo, de dawz gij nit daiq daej. Rumzbaek “huhu” dwk bongj gvaq byaifaex, gij nonhaih ndaw doengh saenzdedded, lumj naeuz: “Seizdoeng caen nit, raeuz yaek souh mbouj ndaej lo.” Mbwn baenz nit, hoeng bouxsauqgai ciuqyiengh mbouj yietbaeg, sauq gai fat ok gij sing “sasasa”. Dwg gij gaenx gyoengqde vuenh daej gij seuq ngoenzneix.

A, biengz raeuz daengxbi seiqgeiq gingjsaek mbouj doengz, gingj gyau vunz ndei, baenzlawz mbouj hawj vunz simmaez ne? (指导老师:黄雪丽)